

tage vnd wer[k]tage, vnd darczu siner swyn warten alle tage vnuorezoglichin nach der alden gewonheit; darczu sal er auch widdir zeu hochezeyten, zeu wyn nach zeu bir gehn ane sins hern loube am wer[k]tage. Item eß ist auch vor alder gewest, welichen gesellen eins meisters koste nicht behagit vnd nicht der koste wert sy, dy sullen solliche koste tragen vor dy hantwerckmeister, so wullen dy meister des gantezen hantwercks vngetwungen vnd vngedrungen sin zeu geben dy nach koste nach der alden gewonheit. Item welch scheider erbeiten wil uff dem hantwerck, dem wil das hantwerck keynen säuberer halden nach schicken nach der alden gewonheit. Auch sal kein geselle, der vnser erbeit thut, keine frauw obir vnser gut furen. Item welch geselle einem meister sin gut felschit in der möle adder vngereden(?) mit freuel heim furet, der sal ein sollichs meistern vnd gesellen vorbussen. Item welch geselle einem meister des hantwercks sin gut infuret, der sal om das zeu nütze erbeiten vnd widder heim furen, welcher abir dorobir mit freuel dauon geet, der sal vnser erbeit nicht haben. Item so sullen dy gesellen keyn bir kouffen wenne sy haben außgedint, eß sy denne mit des rats willen. Item wo die gesellen einen ort haben adder czechen, in welchs fromen bedirmans huße adder hoff das ist, so wullen dy meister vnd das gantz hantwerck, das kein geselle eine frye frauw by sich setzen sal bie einer busse dem hantwerck vnd gesellen. Item es sal vnd mag auch ein iglicher meister eyn knecht myten wo er kan vnd mag, wenne er auß hat gedint, vngestrofft vnd vnuorbusst meister vnd gesellen. Item dy meister vnd das ganz hantwerck sullen vnd wollen kysßin zewene auß den gesellen, dy dy ganteze geselschafft sullen regyren vnd das keyn ander bunth nach keynerley ander gewonheit vndir on gemacht werde, also das der briff vßwyßt.

Solliche obingeschrieben stuck puncte vnd artikel wullen dy meister des hantwercks der becker gehalden haben vnd vorbaß von den gesellen dorobir kein ander gerechtikeit nach ander gewonheit zeu machen vndir on, dy zeu Lipczk erbeiten wullen.

Vnd wir ratmanne vnd gesworne zeu Lipczk habin den gnanten meisteren vnd gesellen deß hantwercks solliche ordnung vnd satezung zeugegeben vnd irloubit uff ein wolgefallen vnd widiruffen, ab wir erkennen, das eß nicht beqweme were. Wir behalden vns auch hirinne insage vnd messigunge aller obgeschreiben puncte vnd artikel, das wir hirinne sagen wullin, wenne vnd wo vns das ebin ist; vnd in sollichir ordenunge sullen auß geczogen sin alle sachen vnd bussen, dy den rath vnde das gerichte anlangen. Factum anno domini xc. LIII^o.

Nach dem Stadtbuch fol. 50 im Rathsarchiv zu Leipzig.

No. 306. 1453 oder 1454.

Taxordnung für den Todtengräber und Abdecker.

Alsus sal iß balden der entdeckir adir der todengreber. Czum erstin, wenne er eynem eyn grab alleyn macht, der do ist gestorben, von dem sal er nemen II gr. Were abir, daz got lange wente, [daz] eyn sterben anqweme adir sust daz drie adir